

IO: BAPTISTAE  
LAVRI PERVSINI  
CLERICI SEMINARIJ

L E O N I D O S.

Siue

DE VICTORIA ADVERSVS ATHILAM  
LIBRI. III.

AD ILLVSTRISS. AC REVERENDISS.  
POMPEIUM ARRIGONIVM  
S. R. E. CARDINALBM.



PERVSIAE, Ex Typographia Vincentij Columbarij.  
Superiorum permissu. M. D. C. V.





# P O M P E I O

## A R R I G O N I O

### S. R. E. CARDINALI.

*IO: BAPTISTA LAVRVS S. D.*



ATIS inter omnes constat, Arrigoni Illustrissime, rerum pæne eundem esse modum eandemq; rationem, quarum vel Ingenium, vel Natura parens est, atq; educatrix. Terra ex minutissimis seminibus truncos ramosq; procreat, quillætos & vberes fructus ferant; vsque dum simul cum Luna senescant, & exsiccati tempestiuè cædantur. Extra vnum obitum, quæ ab ingenio proficiscuntur, educanda illa, & prouehenda; vt in tempore maturescant, ferantq; fructus non præcociis, sed tempestiuè ac solidæ indolis. Proinde quantum quidem lenta arbor in quoque anno profert, vt æquo animo capit Agricola; ita & tantundem vnusquisq; ab suo ingenio: finat ferri illud per suos gradus, nec plus ab eo exigat, quam dando fit; seponat autem, quod identidem dat; daturum subinde maiora, vbi adolescat & perficiatur. Hac vna ferme ratione, Cardinalis eruditissime, vti frequenter soleo aduersus eos, qui mearum virium imbecillitatem cum suarum firmitudine metuentes, vellent; exilia poëmatum argumenta abijcerem, & aliquid aliud maioris operæ ac molis aggredierem; quo cum (quasi alijs poëmatijs satis iam alieni iudicii vada attentauerim) veluti robustiore naui, per hoc vastum scribendi pelagus vela facerem. mihiq; ob oculos illud in primis habendum esse: pusilla quæq; a tempore absorbent, grandia non item: frustra sperandum; vbi multa, sed perexigua scripseris, diesq; vt sit, ea deuora-



deuorauerit; futuram aliquam Metim, quæ ipsi Tempori pharmacum potandum præbeat; cuius vi, quæ antea in os ingesserit, illico euomat: quod Saturno accidit, qui ex se natos filios comesse, fingitur solitus. Certum tamen est mihi, quidquid isti dicant, nolle tenuitatem meam plus nimio onerare: eo autem usque in experiundo esse; dum ætas ingenium obfirmet, frequens scribendi usus informet. Quo fit, ut ego æque amem hæc pusilla, atq; alij grandiora: neq; adeo refugiam illa offerre magnis Viris; qui profecto, si rem perpenderint, tantillam quidem arbitrentur; animum vero longe maximum. Quamobrem, humanissime Arrigoni, hoc quidquid est munusculi, dum certe maiora & grauiora in tuo nomine emittere liceat, eo vultu velim suscipias, quo me quoq; ipsum ab hinc decennium (si fas sit apud claritudinem tuam obsequij mei memoriam recordari primam) scio abs te perhumaniter fuisse susceptum. Vale. Perusiæ ex Sem. Id. Maij. *CLIO. IO. CV.*

## DE LEONIDE, ET AQUILA ILLVSTRISSIMI ARRIGONII.

**E**RIDANI ad ripas Victor LEO depulit Hunnum:  
*Vndis Eridanus nobile merset opus.*  
 Non tulit hoc LAVRVS; sed raptum gurgite ab imo  
*Erigit, & docta cantat in Orbe Lyra:*  
 POMPEIOQ; offert; cuius, pernice volatu,  
*Ales ad aetheros transferat altæ polas.*

Annibal Valerianus Sem. Cler.

DE



DE S. LEONE PONT.  
ET AQUILA, INSIGNI ILLVST.  
CARDINALIS ARRIGONII.



**G**RATV LOR a gemino Laurum custode teneri,  
Excubiasq; trahant hinc Aquila, inde Leo.  
Non poterat ramis insidere fortior Ales,  
Non ad radices fortior esse Leo.  
Fortunata Arbor, si te terrena fatigent  
Tadia, sublimis tadia terget Avis.  
Transferri si ad sacra velis plantaria; eunti  
Dux eadem, & Custos magnus in axe LEO.

F. Christophorus Laurus Acad. Inscensatus.

DE S. LEONE ET PAVLO  
QVINTO PONT.

**E**VEHIT Etruscum Victoria lata Leonem,  
Hungaricumq; Istri pellit ad arua Ducem.  
Crede pio Vati; norunt namq; omnia vates:  
Romuleo LAVRVS de Patre canat idem.  
Efferet Ausonium felix Victoria PAVLVM,  
Thracem Caucasæi trans iuga montis agens.

Fulvius Corradus Sem Cler.

FVL.

# FVLVII CORRADI CLERICI SEMINARI.

## *Argumentum.*

**I**N Latium Hungaricas queritur capere arma cohortes,  
 Magnus in Vrbe Leo qui numina voce precatus,  
 Hostilem auertant ab septem collibus ensem,  
 Aetherias properè rapitur sublimis ad arces.  
 Hic Roma omnigenas clades, & funera deflet.  
 Lucida biga vehit Petrum Paulumq; per auras.  
 Pannonicas numerant classes, franantq; furentes,  
 Dum Calum repetant, caelestiaq; agmina cogant.



IO: BAPTISTAE<sup>7</sup>  
LAVRI PERVSINI

ACADEMICI INSENSATI.

LEONIDOS.

*Liber Primus.*



VSONIDVM columen , seruatoremq;  
Latini  
Nominis , Hungarici calcantem signa  
Tyranni ,  
Mens Superis innixa , canit . Dicite  
canenti  
Calicolæ , qua quisq; manu pugnaue-

rit . olli

Vester honos , vestris exercitus excitus oris  
Militat ; huic torui rabies prætenditur Hunni .  
Vos Phaëtontæi me ad littora sistite fluctus ,  
Et spectare iuuet ; quæ linguæ flammea vibrans  
Spicula , Romanus miti stetit ore Sacerdos ,  
Et grandem aduexit valido de Rege Triumphum .

PAVLE adsis : si te superæ sacer ordo Pronæ  
Euehit ad Primi fatalia scepra LEONIS ,  
Imperijq; apicem ; vestram si carmine puppim  
Assero ab incurfu Getici maris ; adspice porro  
Remige me , quantum pergat : dumq; omnia cursim  
Expedio , ab tuta fige in me lumina prora .

A 4 Eridani

Eridani in gremium placido quā labitur amne,  
 Mincius, agnato referens sua cornua ponto :  
 Sacratīs Marti exsuuijs, positoq; parumper  
 Puluere bellorum; truculenta ab cæde reuersus  
 Italidum, fessa cum classe recesserat Hunnus  
 Athila, & excussis aciem requiescere ab armis,  
 Iusserat. Interea socias arcessere vires;  
 Mox Martem grauiore manu, maioribus ausis  
 Aggredi, & impostas Latio perrumpere portas :  
 Sanguine, Thybri, tuum conspergere littus, & vndas  
 Mole graui premere armorum, bustisq; cadentum;  
 Atq; agere examinem sub sordida vincula Romam.

Fama vigil, Scythici mentem complexa Tyranni,  
 Remigio alarum muros ingressa Quirini;  
 Quæ clades Vrbi immineant, quanto igne calescant  
 Hungaridum mentes, latialem absumere gentem,  
 Nunciat. Vt vero primum penetrauit ad aures  
 Antistes Romane, tuas: quamquam omine Magno  
 Eminent in dubijs tibi mens, quam, nescia vinci,  
 Firmat magnanimi clementior ira Leonis,  
 Hæc tecum, iustis irarum molibus ardens.

Et pereas sic, Roma, licet, seuaq; Getarum  
 Compede constrictam, fas est te Marte cruento  
 Concidere, & medijs dirâ ingemuisse sub armis.  
 Mitto autem clades, incendia feda, calenti  
 Passa æuo; melior fureret cum flamma per artus:  
 An non & Gothicos toties experta furores,  
 Pronior in senium? quid adhuc in puluere seruas  
 Barbaricas strages, Alarici immane furentis  
 Exemplum? nunc Pannonici ne ferre recusa  
 Vincla Ducis, falsoq; animam solata sereno,  
 Excipe supremos moritura in viscera luctus.



*An vero tantum te commeruisse ruinæ?  
 Tot digna vrgeri iaculis? scelera impia, toti  
 Nota Orbi, plenis abs te manantia venis;  
 Calicolum turbata fides, pulsusq; frequenter  
 Religionis amor; stolidoq; ardore Gigantum  
 In summum tela acta Patrem; tot crimina, lapsus,  
 Stringentem gladios, teq; ad grauiora vocantem  
 Supplicia, iratum contra exciucere Tonantem.  
 Sic aliè terræ crassus qui tollitur humor,  
 Et caliganti prætexit inania fumo,  
 Visus Solarem nebula confundere vultum,  
 Solis inardescit radijs; tum versus in imbrem  
 Tecta quatit, pessumdat agros, pontumq; per omnem  
 Aut agit in scopulos, aut funditus obruit Aenos.*

*Ne tamen in Fidei puppim malus ingruat imber,  
 Quæso Pater; neu sint aliorum crimina tanti.  
 Meq; gubernaculi moderantem fræna, procella  
 Implicet, & fracta iaceat cum classe magister.  
 Sat mihi, sat Mundo notum tibi robora quanta;  
 Et quam non meritis par sit vindicta, sed usq;  
 Inflicto longè maior clementia damno.  
 Respice res Orbis, nostros miserare labores,  
 Infestumq; Ducem, rabida cum stirpe Getarum  
 Venturum excidio Fidei, pelle, oro, repelle,  
 Nudatumq; Vrbi remoue a ceruicibus ensen.*

*Quod si non prona mea vota intelligis aure;  
 Rerum Christe sator; saltem ne spreueris illa.  
 Tu PAVLE, & tu Barionide, quibus ordine ab omni  
 Delectis, sacram pinum commisit habendam,  
 Cui præsum: tibi, Petre Simon, qui triste furentes  
 Longè ageres nimbos, & tuto flamine, lente,  
 Transtra mouens, medijs firmares pondera mali:*

Tu vindex, gladio metuendus, turbine ab atro  
 Flammaram eriperes, sævis prædonibus atrox  
 Supplicium intentans, cædemq; rebellibus: oro  
 Afflicte date vela rati, dispellite nubes,  
 Gaudeat immisso felix Proreta sereno.

Talia fundebat lacrymans. Ecce vnus & alter  
 Ecclesiarcæ, rapida delabitur æthra,  
 Romaniq; petit secreta cubilia Patris.  
 Continuo orantem superi candoris ab ictu  
 Impulit. olli autem lenis per pectora fusus  
 It sopor, & iunctus geminis Heroibus, arces  
 Spiritus Empyreas, Astris mirantibus, intrat.

Tum Petrus. O nostri successor maxime Regni,  
 Cui damus æterni fontes accedere fati,  
 Et rerum spectare fidem: dimitte querelas,  
 Et lacrymis impone modum. rata scilicet alto  
 Ista Polo; clades patiatur Roma nefandas,  
 Et cognata ratis vento pulsetur & imbri.  
 Quamquam venturis dabitur consistere in annis,  
 Et Pax Oceani littus percurrat utrunque;  
 Vndenos dederit cum tandem Roma LEONES,  
 Quinosq; extulerint labentia sæcula PAVLOS.

Hæc Pater. Ante Dei vultum mox ducit: at illum  
 Gratus fatidicæ caliginis horror obibat;  
 Obijciens oculis translapsi temporis horas,  
 Præsentisque fidem, venturaque fata nepotum.  
 Præterit ætates multas, quibus enthea Cæli  
 Lux non irrubuit, manans a principe Christo:  
 Pauca sed e multis, Petro monstrante, rotatu  
 Luminis adnumerat; quas hauserit ante ruinas,  
 Quotq; secuturos deploret Roma tumultus.

Hic Tyberim toties ventis pluuiælibus auctum.

Vndan-



Vndantemque sinu, seque extra claustra vomentem,  
 Intrantem plenis in Martia culmina ripis;  
 Cuncta inuoluentem luctu, tecta alta ruentem,  
 Rumpentemque domos, vixque in sua regna receptum.

Hic toties furijs raptam flammantibus Urbem,  
 Et prope septenis impostam collibus Aetnam,  
 Encelado quassante humeros, ac face Neronum,  
 Luctificas stimulante faces, mortemq; minante,

Perlegit. adde luem, corrupto ab limite Caeli  
 Non semel Ausonijs glomerantem funera campis.  
 Vis operit funesta polum, tractusque natantes  
 Aëris inuadit tabes; procumbit in aruis

Culmus iners frugum; pigroque ab vomere gleba  
 Frangitur. & fessos opera inter pallida Tauros,  
 Marcida sorbet humus; grassantemq; orbe Latino  
 Contagem, grauidis iam faucibus expuit Orcus.

Non oculos Simon inuento remoratur amaro,  
 Exigui turbator agri, quem, Petre, colbas.

Ille Gigantæo dum numina despicit ausu,  
 Seq; amens probat esse Deum, seq; arduus alis  
 Dædaleo ritu, Capitoli a vertice, in auras  
 Subleuat; infractis paullatim viribus, alte  
 Decidit, & magicas ora execrantia fraudes  
 Illisere solo; sed nec remorantur iniquæ

Cæsaridum clades, queis pæne a stirpe recisum

Romulidum imperium. Sensu dolor heret in imo,

Dum toties calcata Getis sua regna tuetur;

Nunc flammis, Alarice, tuis populata, supremos

Excludunt gemitus, indignanturq; moueri,

Sueta alios pressisse iugo. spargenda cruore,

Te metuunt, Astulphe, nouo; ni candida coniux

Galla obstet, reprimatq; animos miserata furentes.

Se tamen instantis solatur imagine belli;  
 Pannonicosq; ignes alio ridet igne segandos.  
 Scilicet elabi in nihilum noua praelia, miris  
 Profligata modis; pulchris exercitus armis  
 Instruitur, geminoq; calens sub Principe pugnat,  
 Athilaq; argentem detruditur exsul ad Axem.

Sed non Vandalicis se non agnoscit in armis,  
 Supplicis in morem, frustra pia verba mouentem;  
 Sacris abstineat saltem, nec numina ferro  
 Polluat; at fletus Rex Gensericus inanes  
 Ridet, & immissis legionibus omnia vastat,  
 Pulsatamq; Alnum, Duce vix dum sospite, linquit.  
 Adijce; si Latias seruat Belisarius arces,  
 Dimittitq; viros, qui sacro fœdere, certis  
 Præsidjs, Thuscus latè tutentur, & Vmbros;  
 Narnia te primum, te mox Spolertia tellus,  
 Quasq; premit turres Augusta Perusia, firmant:  
 Barbarus hostis adest; & cum, nec Vitige quisquam  
 Promptius arma gerat, nec quisquam Vitige ab ira  
 Seuius intumeat; sub tanti Principis hasta  
 Nutat, & ingentem queritur pia Roma ruinam:  
 Quamuis ferali repleat claustra undiq; luctu  
 Italicum, cumuletq; licet singultibus auras:

Insurgit Totylas, crebris qui assultibus omnem  
 Dissipat Oenotriam; muros bis terq; cruentus  
 Intrat Romuleos: ac dum percurrit Etruscum,  
 Vmbriacumq; latus (post longa incendia Martis,  
 Conatusq; diu elusos) tandem Vrbe potitus  
 Ghryphonidum, admirans Perusini robora Cæli,  
 Inuictamq; aciem; sat habet si ab iure Latino  
 Deficiat, dedatq; manus; proq; omnibus vnus  
 Sollicitus populi Pastor, Præsesq; verendus

Suppli



Supplicium expendat, solido ab munimine mentis  
 HERCVLEVM cognomen habens. Sed (pace nocentum)  
 Stat sua cuiq; dies: Nucerino in littore Narses  
 Te, Totyla, obtruncat: belliq; in urbine feruens,  
 Idem maiorum vestigia cæca secutus,  
 Septenos vastat confuso Thybride montes.

Inde alias, cladesq; alias non lumine sicco  
 Deorat: ~~unq~~ diu tenuit, certe vltima, Patrem  
 Admirandum. Dominandi insana libido  
 Cesaridum inuadit pectus, Gallosq; repellit  
 Ab lare, & Ausonium petit vsq; in vincula Thybrim.  
 Septimus afflicto Clemens supponitur Orbi;  
 Cui nineum Pacis pignus, fœdusq; potenti,  
 Cantaber inmani sit longè infensior hoste.  
 Ecce autem Insuorum decedens finibus, vltro  
 Fœdera dirumpit, sacram Borbonius Urbem  
 Obsidione premens; & circumquaq; reuulso  
 Aggere; dum scalis in monia nititur altis,  
 (Stat quoq; pro Roma non segnior ira Deorum,  
 Sponte tonans, meritasq; ferens in tempore pœnas)  
 Tormento petitur; glans viuo sulphure adacta,  
 Diuiduum thoraca secat, plumbiq; receptus  
 Ignis, in internos miseri perlabitur artus:  
 Ambustamq; facem, cineremq; in pectore nutrit.  
 Tum late expulsus Romano ab limite Martem,  
 Plenoq; effusam Pacem florere Theatro,  
 Prospicit: Eridanum iuxta, Ferraria tantum  
 Turbat; at Oſtoni bibit hæc CLEMENTIS amorem,  
 Ire per Europæ populos qui fœdera longum  
 Imperat. interea videnti metuenda LEONIS  
 Maiestas, vix ætherias educta sub auras,  
 Abripitur: QUINTO quamquã Roma inclyta PAVLO

Se iactat, gemitusq; omnes hoc Principe mulcet.  
 Quoq; vno sperat Thracas in vincla coactos,  
 Et Maumethæis vexilla erepta manipulis,  
 Ad sanctos ruitura pedes; gentemq; rebellem  
 Sic Pax alma liget, fideiq; in fœdere perstet.

Hæc tantum celeri obtutu Leo colligit, ægro  
 Omina læta fouens sub pectore. Numina vero  
 Bina pium rapuere Patrem, lapsuq; silenti  
 Per fora Calicolum, per ouantis mœnia Cæli  
 Ausonidum in fines, Tarpaia in tecta reportant.

At cum corporeo iam spiritus esset in antro,  
 Nube leui pressus somni, sibi talia visus  
 Excipere. Ab roseo cum Sol candentior ortu  
 Fulserit, & nullo violabitur imbre serenum:  
 Tende volans; qua digressus Benacide ripa  
 Mincius, irriguo per littora voluitur amne,  
 Ingenti vicina Pado. non arma parentur,  
 Ad propulsandum Romani nominis hostem;  
 Sed rigidis longe Arfacidum potiora sagittis,  
 Eloquij noua tela para; pulsoq; timore,  
 Hunnæq; abigens Borealia ad arua Tyrannum,  
 Certa tibi partæ steterit victoria palmæ.

His haud plura Senes: quos candida biga per auras  
 Dum vehit, & Scythici fert ad tentoria Regis,  
 Detinet adspectus Solymææ gentis, & vnda  
 Gnosiæcis reuomens exposita cadauera ripis.

Namq; per id tempus nigri frænator Auerni,  
 Venerat Abramidum placidos turbare nepotes;  
 Progeniemq; rudem, miris inuoluere rerum  
 Casibus. hunc autem species sacra Moseos ornat,  
 Et blæsæ voces, impressaq; cornua fronti.

Qui, dux mentitus populi; dum prisca retrahat

Promissi



Promissi frumenta soli, cælestis & hortum  
 Delitij, ambrosia manantem & nectare dulci;  
 Ac se ducturum veterator spondet: in ima  
 Gurgitis Aegæi sicco pede constitit vlu-  
 Cum grege Iudæo. quemq; humida regna secantem,  
 Suspensosq; inter fluctus planta alite euntem,  
 Lympha, sinu coeunte, vorat: muroq; soluto  
 Aequoris, vndantis queritur per castra profundi,  
 Indocilem pelagi esse fidem, seseq; barathro  
 Deuonet: ijs tantum clementior vnda pepercit,  
 Queis Christi confessus amor. Par ducitur esse  
 Niligenum strages, Rubri inclementia ponti.  
 Cum; ne diuitijs spoliata forte Canopum,  
 Desereret Galilæa phalanx, sectatus aperto  
 Est praedatricem pelago Menphiticus hostis:  
 Quem tamen, haud certè progressum longius, agger  
 Dirutus vndarum, spumanti absorpsit biatu;  
 Et datus est monstris preciosior esca marinis.

Ergo ubi barbaricis fixerunt lumina castris  
 Siderei Patres; spectant sine lege vagantes  
 Hunnorum turmas, & formidata Getarum  
 Agmina. Stat rapidis Nomadum gens apta pharetris,  
 In teneras cui primus amor sæuire bidentes.

Effedones tormenta nouant, sueti ora nefandis  
 Funestare cibus. quippe indefleta parentum  
 Funera psallenti cum produxere corona;  
 In cætum adscitis ex omni parte propinquis;  
 Dilacerant crudo dissecta cadauera dente:  
 Artubus & mistis pecudum (nil dulcius vsquam)  
 Aedificant epulas, Phario vel ab orbe petitas:  
 Ossa tamen capitum, meliore incincta metallo,  
 Auratos in crateras conflare laborant.

*At saxo lauat gladios Scythæ, cadibus instans;  
Sanguineas modo potet aquas, quibus ipse natarie  
Hostis, ab obscena populi feritate peremptus.*

*Pila acunt Tauri, quos efferus ardor iniquos  
In ius fasq; agit: Hospitio quoscumq; receptant;  
Incantos ferro superant, proq; Arietis extis,  
Sanguine præ pecorum; cultro per viscera adactio,  
Luce sacra, sævis maculant crudeliter aris.*

*Stant et bellaces Neuri, quos sordida virtus  
Venantum iungit studiis, & amicta dolosis  
Vultibus, æstino tellus dum fidere feruet;  
Transformat se se in facies, atq; ora Luporum;  
Et nemora incursu vastat, molitur & arma,  
Vulpibus, in vultusq; redit mox versa priores.*

*Insequitur, madidis quem proluit Ister arenis,  
Bulgarus; horrentes quo non accendere pugnas  
Promptior, aut quisquam flagrantis in turbine belli  
Missilium tristi nebula felicius hostes  
Inuoluisse queat; pugnaq; tumescat equestri.  
Gens ea contemptrix Superum, Phlegraeq; rursus  
Bella velit, Cæloq; Deos pepulisse sereno:  
Te tantum (Mars) excepto, cui dira nefastis  
Ponunt templa locis; pugnaq; erepta procellis,  
Fracta virum spolia, & galeas ab sanguine turpes,  
Ense dicant stricto; qui ihure superbus honoro,  
Sacrandas alijs, vnus sibi vindicat aras.*

*Adde Melanchlanos, imitantes tegmine nigro  
Cimmeriæ furua antra domus. Et crine comantes  
Ceruleo, vultumq; trucem pictos Agathirfos.  
Adde & ab Herculeæ manantes prole Gelonos,  
Lac perpotantes, & equinum in lacte cruorem.  
Arma tonant Garusq; pedes, sortesq; Georgi,*

*Infæ*

Insanumq; crient, Roma, in tua funera Martem:  
 Quem longè ex voto venientem (o pectora cæca,  
 O curvæ in terris animæ! tantisne tenebris  
 Transversos vos error agit?) vexilla mouentem,  
 Hortantem pugnas, vltro prono ore saluant.  
 Hocce autem licuisse tibi Pluto, improbe Pluto;  
 Vt vel ab antiqua surgentis origine mundi,  
 Curaris tua sceptrâ coli, tibi templa dicari,  
 Et falsa populos sub religione tenere?  
 En modo vesant velatus imagine Martis;  
 Classica bellorum promens, incedis anhelis  
 Conspiciendus Equis, famulo comitatus Auerno;  
 Dasq; animum viresq; adeant iam regna Quirini,  
 Rostraq; barbaricis violent Romana trophæis,  
 Et Christi euertant vigili cum Principe puppim.  
 Quem non Barionidæ, non Paulli tela tuentem,  
 Latè pugnacis spatiantem in puluere campi,  
 Non animaduersum latitanti ab numine fulgur  
 Percutit: utq; actum sensit diuinitus ictum;  
 Protinus infernam redijt fremebundus in aulam,  
 Fumeus, Hungaricum valido molimine Regem  
 Impellens, stupidasq; ligans horrore phalanges;  
 Tunc aliquis Regem iuxta, cui dextera bello  
 Fortis, at in dubijs potior sententia rebus;  
 Quin, ait, expendis, dudum quæ cæpta fatigas  
 Consilia, & Latios propius non concipis agros,  
 Propositumq; urges? quæ nos, quæ pigra retardat  
 Sedulitas? cur non propere caua buccina somnos  
 Excutit, & strictis mucronibus, agmine facto  
 Ausonium gerimus victricia signa per orbem?  
 An non segnitiem Mars indignetur, equisq;  
 Retro actis, Geticas redeat festinus ad oras?

B Vidimus



*Vidimus expositum feliciter ire per agmen ,  
 Vidimus ardentem cedes , solitoq; calentem ,  
 Sanguine ; respuimus , qui sic excepimus : ast ò  
 Gradiue , o numen bellis placidum , adspice porro ,  
 Adspice socordes ; sed iam tua signa secuti ,  
 Induimus clypeos , tentoria rumpimus , alnos  
 Scandimus , imbellemq; animo præsumimus Urbem .  
 Tu peragi ista , iube ; nunquam melioribus , o Rex ,  
 Utêre auspicijs , aptat Victoria pennas ,  
 Christiadum spondens trepida de plebe triumphum .  
 Currit ab his ingens Hunnea per agmina rumor ,  
 Permistus clangore tubæ , furialibus ardent  
 Castra odijs , ferri rabies crudescit ubiq; ,  
 Et vastum galeis potare Anienem anhelant .  
 Sic , ubi raptorem fecundo ab rure fugandum ,  
 Rusticus inclamat , pubes coniurat agrestum ,  
 Vi prohibere parans . pars hæc hastilia flammis  
 Durata hæc castris dextra capit , illa ligones ,  
 Contosq; , & duri metuendum robur Aratri .*

*Vt magni patuere ausus , ruituraq; iam iam  
 Signa , Quirinali fatum latura cohorti ,  
 Eridani fremuere vadis ; mens utraq; longè  
 Heroum indoluit : medio sed ab æthere Petrus  
 Labitur , & trucibus formidandum Athilan armis ,  
 Obiectus nebula adcedit , nutuq; potenti  
 Grandius accersit , cui Rex datus Athila , German .*

*Nam duplex Genius , Ducibus toto orbe regendis  
 Præficitur ; qui sub primoribus inditur annis ,  
 Et cum dignantur sceptris , legesq; ministrant  
 In populos : seu barbaricis nascantur in oris  
 Trans Tanaim , trans Sauromatas ; seu sanctior orbis  
 Educet , & fidei pastu melioris alantur .*

*Verax*

*Verax ætherij clementia Principis! vno  
 Velle sub amplexu terrena, æterna ligare;  
 Solisq; irriguos ignes differre per omnes  
 Terrasq; tractusq; maris, Cælumq; profundum;  
 Qua lux vera natat; qua caligantibus horret  
 Mens armata odijs, seq; atro in corpore miscet.*

*Ergo Ducis Scythici Genium conuenerat heros,  
 Alloquioq; vtens, quo summi ante ora Parentis  
 Discretis late ordinibus mysteria pandunt  
 Inter se Superi, committit talia. Cernis  
 Fide vigil, quanto Romana in mœnia cursu  
 Tendat, & in memet quam multa clade feratur  
 Athila: vinclo inhibe, quantum fas, comprime motus  
 Barbaricos. Stolidi ante oculos (te afflante ministro)  
 (Dum saltem Ausonia veniat Leo magnus ab vrbe)  
 Trux Alaricus eat: Romæ quam toruus in armis  
 Fulserit (exigui medio mora temporis) idem  
 Funere quam subito Rhagini in littoris ora  
 Vitam exhalarit. dictis Senioris obedit  
 Aliger; ac stygys dum forte Alaricon ab antris  
 Euocat, & visu rem sæuius vrget amaro;  
 Abscedunt gemini Patres, campisq; relictis  
 Aëris, ad sedes remeant felicitis Olympi.*

*Ætheris interea summi spatiantur in aula,  
 Consilia inter se Gothicis de rebus agentes.  
 Cum Paulus gladium vibrans, pia classica labris  
 Admouet, & misto media inter murmura risu,  
 Suscitât empyreas classes, firmatq; Simonem.*

*Non tibi ab hoste timor, cui iam perfracta minarum  
 Cesserit in nihilum vis effera; iussa vbi primum  
 Angelus implevit, steteritq; ad flumina vultu  
 Iam propiore Leo, telog; armatus, inermis*

Pannonicum in Regem sanctos iaculabitur ictus:  
 Nosq; Senem valido munimine Virimq; iuvenes  
 Multus ab ætheria comitabitur arce satelles.  
 Ergo cœlesti properemus ab agmine certam  
 Scribere militiam, formidatamq; cohortem  
 Instruere; inuictis præcingere corpora ferro,  
 Et Galeis operire caput, contraq; Tyrannum  
 Tendere; supplicium, tormenta æterna minari.

Sic ait, & nutu magni Barionidæ in armis  
 Excubat; ac veteris pugnae memor, vrbe Damasci  
 Spumanti cum vectus equo, bella horrida latè  
 Infremeret; sæuiq; pericula Martis adiret,  
 Delectus habet; Hungaricam quo milite gentem  
 Terreat, & gelidam detrudat victor ad Arcton.

## FVLVII CORRAD I CLERICI SEMINARI.

### Argumentum:

**P**ERGIT ad Eridani ripas digressus ab Vrbe;  
 Et ducit secum bellorum puluere clarum  
 Carpiliona LEO qui exardens inter eundem  
 Longa Via verbis abstergere radia, & hostis  
 Cursim perlegere & mores & robora: iuxta  
 Carpiliona monet; qui, ducto longius orsu,  
 Inchoat affatus, & formidabilis Hunni  
 Ortusq; & studia & mores & praelia narrat.



21

# IO: BAPTISTAE LAVRI PERVSINI.

LEONIDOS.

## *Liber Secundus.*



*T* non magnanimi bellatrix cura Leonis  
Concussa trahit Vrbe moras : iam lique-  
rat Arces  
Romulidum , iamq; & Veios, Cyminiq;  
cacumen .  
Deseritur celebri gens lōgum obsessa Ca-  
millo ;

*Vrbsq; iugis imposta Vetus ; tum tramite laeo ,  
Politianæi Montes , gratissima Cælo  
Culmina , seu triplici redimitum tempora mitra  
Cervinum , seu dent roseo radiare galero  
Taurusios ; Bellarminos : adde arua Senarum ,  
Arua quidem longe felicia ; nomina cessent  
Pontificum , quotquot priscis Deus ante sub annis  
Extulit . Vnus adest , sibi quem stirps alta Quirini  
Vindicat , omnigenum seriem transgressus honorum ,  
Immensamq; Petri frenat BORGHEIVS Alnum ,  
PAVLI pacifero gaudens cognomine . Iamq;  
Dulce solum Floræ , Fernandi Principis oras ,  
Præterit , & paruo qua sparsa Bononia Rheno ,  
Appenninicolæ spectat , qua liuida Manto  
Opposuit Graijs , mansurum , in sæcla Maronem .*

*Dum tamen, insigni procerum comitante corona,  
Hoc iter ingreditur; cupidus cognoscere Regis!  
Ortusq; & studia, & mores, & praelia; iuxta  
Carpiliôna monet, qui nuper sævus in Hunnum,  
Sub Ducis Aëtij ductu distrinxerat ensen.*

*Ille hæret, paullumq; Patrem sermone modesto  
Extrahit; atq; audas coëmens ad carmina mentes,  
Incipit. Hungarici natalia fæda Tyranni  
Ordior, & patrio deductum ab limite, sistam  
In Catalauniadum campis, fractisq; Aquilæ  
Moenibus, ancipiti ludo mortalia passæ  
Vulnera. Pannonicum frænabat belliger orbem  
Mandulcus, Geticas suetus flammare phalanges,  
Immanes Herulos, immansuetosq; Gothunnos  
Christigenas contra. Fuit huic clarissima formæ  
Sidere, Dannubij ad ripas generata Choaspis,  
Centum optata procis; sed citra æquumq; modumq;  
Pronior in Venerem: & quantum nix sole liquescit,  
Sithonio de monte cadens: tantum illa sagittas  
Corde Cupidineas, populaturosq; bibebat  
Idalia de matre ignes. Ergo anxia Patrem  
Cura premit, Natamne velit sub iure paterno  
Viuerè adhuc, prorsusq; faces nescire maritas;  
An potius sociare toris, & sanguine dignos  
Transferre ad generos, ac, si fors vota secundet,  
Maiores adscire etiam, præq; omnibus, illum,  
Cui dat inocciduos Vrbs Byzantina triumphos.  
Sed ratus ad thalamos properandum; cætera Gnata  
Posthabet: Eoi connubia Principis ambit.  
Interea in labem generis ne quid malus error  
Contrabat, & stolido, qua fas, occurrat amori:  
Turribus includit celsis, breuia ostia ferro.*



Sepit, & exiguus famularum admittitur ordo.  
 Tantum, semotæ lenimen dulce Iuuentæ,  
 Ore Canem nixeo Genitor committit alendum;  
 Quem Canachas inter, latratoresq; Molossos  
 Duceret in silvas, obscuraq; lustra ferarum,  
 Auspicio Diana tuo. Sed enim ægra, dolensq;  
 Flebat ab adspectu Virgo subtracta virorum,  
 Aede latens; quam diuisam popularibus auris,  
 Arcta fenestra aperit, proceraq; culmina tecti  
 Lambit, & emissos conuertit ad æthera visus.  
 Illa quidem noctes lecto vigilare serenas,  
 Illa dies tristi solidos traducere vultu,  
 Tum cœtus odisse suos, alere vsq; sub imo  
 Pectore suggestas petulanti ab Cypride flammæ.  
 Nec mulcere animum vana spe callida Nutrix  
 Quibat; adulterijs nimium mens cæca pudendis  
 Excubat. Ab discors animæ tenor! o tenebrofi  
 Vis horrenda Erebi! quæ recto a cardine sexum  
 Feminæum prima exturbas, fractumq; furenti  
 Subiicis imperio, mergis Phlegethontide flamma,  
 Et Venere incæsta. Quid vero mollijt artus,  
 Atq; inconcessum satiauit pectoris ignem?

Parce Pater; rerum series infanda relatu  
 Accumulat; quodq; ora mihi velamen honestum  
 Circuit, hoc castas, oro, tibi contegat aures.

Alecto substrauit iter, cinctumq; proteruo  
 Gestans angue caput, feralem irrepsit in aulam,  
 Virgineumq; adiit, nulli deprensa, cubile.  
 Forte aderat nox sexta, Astro nox sexta nefando  
 Fulserat. assuetis incanduit ægra venenis  
 Virgo, auido composita toro: tacite aggerat olli  
 Eumenis atra luem; stat fæda Licentia rupta

Compede, inauditum scelus horula parturit. Ab quid  
 Non peperit fulmen rabies ventosa trifidum,  
 Non tulit ad stygias tellus abrupta cavernas?  
 (Mens refugit memorasse Canem) tali improba mæcho  
 Nusserat, & primis Aleæto pronuba tædis  
 Affuit. illa haustam Cocyti e fontibus undam,  
 Illa & flammifero raptas de vortice prunas  
 Antetulit ridens; mox rauca sonantibus hydriis,  
 Flagitia impuri cecinit reticenda Hymenæi.  
 Hinc ventris tumuere sinus, intraq; receptum,  
 Viscera sensit onus. progressu temporis illic  
 Insurgentem vterum deprenderat indice certo  
 Casta cohors; deforme Animal dum lumine fixo  
 Virgo ferit, notæq; Animal blanditur amanti,  
 Ingemit, & raptum dominæ indignata pudorem,  
 Ense Canem iugulat, summa & de turre cruentum  
 Deiecit. Insanos animi ciet effera motus,  
 Et facies flammata rubet, sibi perdita ab omni  
 Ictum molitur telo: sed subtrahit omnem  
 Materiam lethi grex prouidus, & (mora nulla)  
 Indicium facti patrias transmittit ad aures.

Horruit infelix Genitor; primoq; rigentem  
 Cogitur in glaciem, perq; asperatela pudoris  
 Disperit: inde gelu paulatim abeunte, solutum  
 Purpureo tumet igne iecur, flumenq; coacti  
 Sanguinis in spumas abiens, hæc verba furenti  
 Suggestit. I, fidis Natam committe latebris;  
 I, notis seiunge choris; I, limina ferro  
 Obstrue, & occultam defende vrgentibus armis:  
 Irrumpet fatale malum, furtimq; subibit  
 Nequitiosa Venus. Quid nunc mihi culta per aras  
 Cum Mauorte tuo, Venus es? quid numina myrto  
 Cingimus,



Cingimus, & pictis decoramus templa rosetis?  
 Sit vero in fatis, qui natam expugnet adulter;  
 At simili de stirpe tamen, cur monstra nouentur,  
 Cur generis diuersa lues? cur sparseris in nos  
 Tam sedum sors dira nefas? iam Creta nefastos  
 Miratur stupefacta toros. excusat amatum,  
 Pasiphaë superata pecus. peiora quid ardes,  
 Quos talamos incesta petis? Nata impia; pestes  
 Inter Auernales primis numeranda sub annis?  
 Scilicet in faciem, si sis mihi perfida præsens,  
 Irruerim, & gladio turpissima facta piarim.  
 Sed labes celandam tamen; coniuxq; legendus  
 Ex vernis, ex Aulicis; indignaq; sceptris,  
 Edita discordi det nobis pignora ventre.

Sic ait, & Gnatam tecta ad regalia duci  
 Imperat. effractus defleuit adultera postes.  
 Tum tristes deiecta oculos, confessaq; vultu  
 Læsi signa animi, pudibunda ante ora Parentis  
 Prodiit, & ruptum gemitu testata pudorem est.  
 Nec mora Pyrrhides, cui sit ducenda Choaspis  
 Seligitur; quamquam tædis male passus iniquis  
 Iungier, & dubia iam virginitate iugari.  
 Ergo sacris Hymenæus adest, vulgata per Istrum,  
 Pompa sonat, patrio connubia barbara ritu,  
 Et repetita noui celebrantur fœdera lecti.  
 Iamq; ex congressu, tumefacta uxoris in aluo  
 Vir sobolem creuisse videt; iamq; adfore tempus,  
 Quo portentosi dicatur germinis auctor,  
 Ancipitem Lucina diem, partusq; futuros  
 Accelerat: Nox ante tamen, qua prole leuanda es,  
 Dat, Mulier, prænosse tibi. Nam (Luna supremum  
 Decurrebat iter) visa est peperisse biforem.

Ambiguo

*Ambiguo de patre Canem: diademata Regni  
 Fronti inerant; cum dente latus laniasset acuto  
 Ipse suum. iam cæde ferox latratibus aliis  
 Europæ quatiebat agros; metuendus in agnos  
 Irruerat, sancti referentes signa cruoris.  
 Incurſu Latij custos gregis arcuit: ille,  
 Compare suscepta, ripis se reddidit Istri.  
 Inde satur pastu, viridi dum fessus in herba  
 Stertit, & hesternam ructatur luridus escam,  
 Sanguinis obscæna illuue perfusus, adunca,  
 Excludit de nare animam. Mæstissima mater  
 Diriguit; simulas visa est excisse propinquas;  
 Excierat: grex multus adest, dominamq; recenti  
 Se se torquentem fœtu; iam iamq; dolentem  
 Ex vero, & tumidi laxandam pondere ventris,  
 Circumstant; fer opem, clamant, pia Iuno: repente  
 Infans ortus erat; facies sed bina tuenti  
 Fulserit, hinc hominis, Canis inde, utrumq; utriusq;  
 Manat ab effigie. Pyrrhiden terruit omen,  
 Incusansq; Deos, sobolem execratur acerbam;  
 Hæret; an exitio, turpi cum prole, parentem  
 Destinet, & cesset miseris increſcere tædis  
 Dedeous. At soceri timor hinc abduxit, & inde  
 Aurea spes sceptri, quod rerum debitus ordo  
 Transferri ad Natam, propioraq; pignora sanxit.  
 Adde, quod & cæde abstinuit, mentemq; benignam  
 Induit in matrem, timidaq; in Germina matris,  
 Longæui sermone Senis; qui ingressus in aulam  
 Principis, immodica sese affliçantis ab ira:  
 Pone, inquit, curas, & quæ tua pectora nubes  
 Plus nimio obsedit, peioraq; disce vereri.  
 Ne mirere, patri similem quod non tua coniux  
 Ediderit*

Ediderit sobolem. Vis huic arcana sub ipsos  
 Concubitus; si qua ad mentem prorepat imago,  
 Spiritibus clausa inuehitur, sensuq; potenti  
 Defertur; qua parte uteri suscepta fouentur  
 Concubia, inq; hominem coeunt. Sed percipe porro  
 Quam tibi ab Aethiopum populis breuiore profatu  
 Prominus historiam. Qua Cancro incensa, nigrantes  
 Zona premit gentes, Rex imperitabat Hydaspes,  
 Persina iunctus talamis: huic, nocte silenti  
 Dum Veneri indulgent, candens occurrit imago.  
 Harebant muris suspensa aula. niuali  
 Tincta aderat candore oculos ac corpora Virgo  
 Andromede, duris humeros religata catenis.  
 Candida lucenti veniebat Bellua ponto;  
 Sed super impendens alis candentibus, acri  
 Arcebat telo Perseus, trepida ora Medusæ  
 Pretendens, niueosq; nigris pro crinibus Angues.  
 Hunc niueum Archetypum, nitida hæc simulacra bibebat  
 Obuersis Regina oculis, partusq; sub ipsum  
 Tempus (nigranti miracula horrenda Syene,  
 Aethiopumq; solo) niueum sub luminis auras  
 Enixa est pignus, nigra Matre, & Patre nigro.  
 Tantum animæ externis vis indeprenta figuris  
 Inficitur, tantumq; alieni inolefcit imago.  
 Pelle procul tenebras, florescant tempora risu,  
 Et natam sobolem ridenti respice vultu.

His dictis, paullum corda indignantia soluit,  
 Depositaq; ira; plenis assensibus aula,  
 Athilan, infantem proavi de nomine dixit.

Labitur interea celeri vertigine Cælum,  
 Quodq; Poli numeratq; vias, paribusq; rotatur  
 Raptibus. egreditur pueriles protinus annos,

Atq;



Atq; intrat primæ vestigia cruda iuuentæ;  
 Haud illum vincat cornu leuibusq; sagittis  
 Hunnus; non curua metuendus falce Gelonus.  
 Cesserit armato clypeum munire lacerto  
 Sarmata; puluereos Herulus percurrere campos;  
 Et Francus rapido fluium transnare natatu.  
 Haud illo æstium quisquam patientius Astrum;  
 Haud illo hybernos quisquam tolerantius imbres  
 Perferat; exiguus somni, patiensq; laborum,  
 Arma fremens, audax animi, imperijq; petitor  
 Anxius, indocilis fidei, mente efferus, ore  
 Subdolus; incessu segnis, totoq; superbus  
 Vertice, grande caput, corpus breue; lumina densis  
 Iuncta supercilijs, flammis certantia, in orbe  
 Huc illuc distorta suo; dubiumq; colorem  
 Mistâ ab stirpe refert; sima nare, aure sagaci;  
 Indulgens Baccho nimium, certamina cuius  
 Pugnat apud mensas; & totius agminis vnus,  
 Vno haurit numerans carchesia marcidus haustu.  
 Quo vero emineat rerum scelerosior ordo;  
 Pronior in Martem, Marti acceptissimus idem est,  
 Sæuior in Christum, Christo insensissimus idem est,

Idem ergo spacijs factus iam grandior æui,  
 Fratre suo natu maior; cum tristia primum  
 In Patris senium fata irrupere; potentis  
 Suscepit frena imperij, funestaq; belli  
 Signa mouens, imisq; coquens certamina venis,  
 Proterit Illyricos, prosternit in agmine Thracas,  
 Parrhasios populos in prælia suscitât; olli  
 Gepida, & Ostrogothus, iaculoq; potentior Hunnus  
 It comes, & cupidum bellax Arnestida vincit.  
 Hunc ad Pyrrhidæ fremitus stricto ense fugandos

Missum,

Missum, conspicuis primum Victoria pennis  
 Excipit; at placidi successu Martis ouantem,  
 Incautum, excordem vigili ferus Athila cornu  
 Occupat, & stygias cæsum dimittit ad umbras.

Sed quia Pannonicum clades inuaserat agmen  
 Hinc formidato volitans Discordia ferro,  
 Primoresq; Ducesq; inter; malus inde cadentum  
 Horror, & in putri moriens bellator arena:  
 (Nam ieiuna fames virus lethale per omnes  
 Fuderat) Hungaricum propere remeare sub axem  
 Cogitur. hic Bledam, Romanæ commoda Pacis  
 Dum suadet, fratremq; monet, qui mollius Hunnos  
 Temperet, & Reges ultro sua signa secutos:  
 Idem & Bleda tamen præcingere mœnia Budæ  
 Nititur aggeribus; Scythici prope littoris vndas  
 Insidijs clam dispositis, sæuo ense trucidat.  
 Porro hac cæde ferox in Regum subdita colla  
 Altius insurgit, famulùmq; adscribit in album  
 Valamirem, Ardarigum, quib; late Gepida pugna  
 Seruit, & Ostrogothus. Sed iam reparauerat omnem  
 Militiam, quam discordi furor hauserat igne,  
 Quamq; auido violenta fames damnauerat orco.  
 Adijciunt sese huic Heruli, Quadi; arma Toringus  
 Huic stringit, gelidamq; obiens Meothin Alanus.  
 Inde auidus pugna, occiduam percurrere Calpen,  
 Et Theodorici prosternere signa furentis,  
 Signa per Hispanum quæ late sparserat orbem;  
 Cogitat. ante tamen magno molimine furtim  
 Aëtium pretio oppugnat, Romana fouentem  
 Præsidia Aëtium; ne suggerat hostibus arma  
 Visigothis. parte ex alia connititur astu  
 In Theodorici depromere tela ruinam,

Quem

Quem nuper Latij grassantem vidimus oris  
 Aëtium contra. Sed enim fraus utraq; neutram  
 Sortita est mentem, sat docti, nolle Tyranno  
 Fidere Pannonico. tristi irritatus ab ira  
 Intumuit; quo more vndas cum feruidus Eurys  
 Incidit Ionias; tumidos assurgit in orbes  
 Lympha rapax, seseq; aperit diuisus utrimq;  
 Gurges, & externis ponit sua littora campis.  
 Iam te Rypheis Germania tractibus acri  
 Marte grauem recipit, te limes Gallicus horret,  
 Athila: tu veluti fulmen, quod ab æthere lapsum  
 Austrorum genuit vis importuna, per agros  
 Funestum molitur iter; quæq; attigit, altos  
 Dissipat in cineres, & ubiq; incendia nutrit.  
 Sic prope, fulmineo qua fers vestigia passu,  
 Cuncta igne inuoluis, ferriq; ab turbine vastas.  
 Quid referam Rhæmense solum, quam funere multo  
 Arserit! hic animi egregium, sanctoq; calentem  
 Flamine, adhortantem populos, in federe perstent  
 Christiadam; gladio non horruit ire peremptum  
 Nicasium, non Eutropiam; quam perfidus Hunnus  
 Incursu primo si non transuerberat ense  
 Pignore pro formæ: pietatem exosa nefandam,  
 Prouocat illa hostes, & sacræ verberare lingua  
 Pungit, quo nolint sibi parcere. Quæue celebrem  
 Laude Lupum, Christi tremefacta armenta tuentem?  
 Cuius cum circa trepidum fremuisset ouile  
 Barbarus, & teneros quateret balatibus agnos:  
 Humanæ contemptor opis, purum æthera miti  
 Corde adit; ac superis dextram splendoribus armans,  
 Fertur in obstantes acies, lumenq; tremendum  
 Diuidit, & solito spoliatis lumine flammæ

Imprimis



Imprimis ætherias. caligo æterna furentes  
 Arcuit obtutus, nullaq; utrimq; ruina,  
 Ingressi peragrant Trebasinæ mœnia gentis,  
 Nec nisi trans portas oculorum redditur index:  
 Sic quondam, referunt, misisse Benadida regem.  
 Syriacas classes, Dothain per pascua, iuxta  
 Israëligenum terras; quæ cuspide sæua  
 Perdere Eliseum vigili statione pararent.  
 Ille, fide Superum diuinitus implorata;  
 Non aduertentes, inopino luminis ictu  
 Percutit; & cecos dux ipse incognitus, agros  
 Ducit in hostiles, atq; in Samaritida terram,  
 Discussis illic tenebris. Nec carmine nostro  
 Indicta, o patrios hoc æui egressa Britannos,  
 Vrsula, transieris: te Cælo adscripta trahentem  
 Sæcla Puellarum; talami quod iura recuses,  
 Virginea cum pube necat. Stupet effera corda  
 Rhenus, & immutat peregrino sanguine fluctus.

Ecce autem Aëtij vires fracturus, in oras  
 Rursus Tectosagum, Catalauni ad mœnia turmas  
 Hunnus agit: Vatis dicto, qui lucis in ortu  
 Aegram falsidico tumefactus Apolline mentem;  
 Hoc monuit sermone Ducem. Lux ista nefastis  
 Plena Deis, dabit Hungaricis ingentia campis  
 Funera; quam cladem Dux obtruncande leuabis  
 Agminis infesti. Vox hæc spem pavit inanem  
 Regis, in Aëtium præsagia dira ferentis.  
 Ergo ineunt pugnæ; gemitus hinc inde cadentum  
 Personat, in Geticum quamquam violentius agmen  
 Mars furit. obijcitur certantibus alea fati:  
 Sed Theodorici in caput insperata cadit fors.  
 Elusa hinc rabies Scythici ductoris, acerbum

Ingemis

Ingemit, atq; iterum conducto milite in hostem  
 Arma remolitur, bellatricesq; reposcit  
 Ad noua bella Aquilas. Sed mors properata retorfit  
 Consilia: Aëtium Romanæ gentis Achillem,  
 Magnanimum Aëtium non equo iure peremptum  
 Vidimus. O Gothicis posthac viduata trophæis,  
 Semper ab ancipiti rerum turbata tumultu,  
 Patria! præcipitis quid post furias Alarici,  
 Quid tibi cum bellis? nequicquam, Roma, sonanti  
 Nunc premerere metu: vis a te exempta pericli  
 Longe ageret: magnum non lex aduersa Leonem  
 A grege distraheret: non his regionibus altum  
 Solliciti raperemus iter. Te, vindice dextra,  
 Athila comprimeret, nudoq; in puluere prædam  
 Linqueret Alitibus; populos tua iura verentes  
 Trans Pontum, trans perpetuis obsessa pruinis  
 Regna relegasset, qui nunc fato occubat. At nos  
 Nitimur heu frustra verbis. non ille resumpto  
 Excidit a scelere: trepidam succendere ferro  
 Occipit Italiam; transfert huc robora regni,  
 Quotcumq; æquoreis Vrsa educat exul ab undis.  
 Ergo Pannonias confestim classe frequenti  
 Deserit, atq; ausis ingentibus omnia passim  
 Diruit: Aeolias imitatus Marte procellas;  
 Si quando emergant reserato a cardine montis,  
 Claustra sali, secreta soli, iuga, nubila, siluas  
 Concutiunt, Mundiq; fidem, nexusq; resoluunt.  
 Hac face pugarum iam feruidus Athila Carnos,  
 Iamq; forum Iulij transcenderat. Aemula Roma,  
 Perfugium nostris Aquileia cohortibus vnum,  
 Nisibus impetitur totis; ductoq; potenter  
 Aggere, & in gyrum positis legionibus, Urbem

*Hæu male securam, longa obsidione fatigat.  
 Ter flauam messor Cererem, ter Vinitor vuam,  
 Prefferat, in totidemq; orbes Ver, Bruma secarat  
 Tempora. Cum lente instantis caligine belli  
 Vrbs perfusa oculos, expertaq; Marte sub ipso  
 Neruorum sonitus, & pila frementia, quamq;  
 Non æquo starent acies discrimine; muros  
 Ambiri late, nullas admittere vires,  
 Impendere famem, rebusq; exercita in arctis  
 Dissidia, extremo nil iam differre periclo:  
 Aspere agi ab se se reputans, nisi callida ciues  
 Ipsa suos alio dimittat, ceu pia mater,  
 Cum natis instant crudelia vulnera, pectus  
 Obijcit ipsa suum, crebroq; paciscitur ictu  
 Progeniem timidam. Quando ergo immota cruentam  
 Fata necem spondent, decurruntq; ordine certo  
 Vellera Parcharum: confestim examine magno  
 Trudit in Hadriacum litus, propioraq; late  
 Oppida; qua medijs in fluctibus, altera Delos,  
 Constitit, & Venetum deducit origine nomen.*

*Ante tamen dulci inuento sparsa agmina fallunt  
 Hungaridum, & dubia falsi sub imagine belli  
 Hostiles acuunt animos; qua parte tenaces  
 Vrbs coit in lapides, prospectuq; ardua longo  
 In præceps Arx alta patet, muriq; labantis  
 Circumcingit opus; qua non obsistere telis  
 Aptior, & celeres fundarum auertere pulsus  
 Fortior: atq; alibi nutent cum mœnia, primo  
 Occasura ictu; si fors dira indicet hosti;  
 Omnis in hoc Urbis tractu stat cura; furentes  
 Huc cogunt capere arma acies. sic vertice ab omni  
 Militiæ in veræ speciem, vigilantia pila*

C Disponunt



Disponunt: habet insomnes custodia muros;  
 Ludicroq; Urbis magnæ latera omnia complent  
 Milite; quem trabibus solers fabricator acernis  
 Struxerat, & veris onerarat bracchia telis.  
 Contrahere hunc arcus, illum tormenta volucris  
 Saxo armare putes; hunc toto concita nisu  
 Missilia urgere in cuneos: in prona repulso  
 Stridet funda globo; pæne ut displosa feratur  
 Plumbea congeries, flatusq; retundat inanes  
 Hunni; pars gladijs, pars tuta bipennibus; omnes  
 (Unus amor) ficta turres statione coronant.  
 Elusit fraus ista hostem: dum tramite leuo  
 Clam portas aperit fugitiuus ciuis ab Vrbe.  
 Subrisit toruum Fortuna, atq; omine aperto  
 Indicat excubias infano Marte teneri.

Porro stridenti crepitare Ciconia rostro  
 Non semel audita est; atq; Urbis peste repulsa,  
 Visa est pallentes sua pignora ferre per auras.  
 Forte etiam Aligerum turmæ per inane volantes,  
 Vnguibus intortis abiegni militis ora  
 Insedere ultro; nec quicquam profuit arcus.  
 Tum ratus insidias Hunnus; toto impete portas  
 Arietat, auulso patuerunt cardine, & omnem  
 Confertim turbam, nullo prohibente, receptant.  
 Nec mora, disiectis alte seges ignea muris  
 Emicat; & qua qua Bellona pepercerat, illac  
 Volcanus ruit immixtis truculenter habenis.

Ac veluti validis remorum impulsa lacertis,  
 Quæ certo primum stetit æquore, concita cursu  
 Percurrit vastum Ratis imperterrita pontum.  
 Sic prope victrices referens hinc Athila palmas,  
 Imminet Italiae toti; postq; eruta circum

Oppida:

Oppida, post steriles pulsus cultoribus agros;  
 Cogitat Ausoniam; Tyberim quoq; propter amœnum  
 sistere equos, fractaq; anidos dimittere Roma:  
 Quam nunc seruat bonos, Pastor, tuus. O Leo sanis  
 Edite temporibus: quam duro cogeris astro,  
 Orbe peregrino ferales ire per oras!

En pene Eridanum premimus, propiusq; Tyranno  
 Absumus. ab trepidis adspirent numina votis;  
 Teq; animi inuictum, voti velit esse potentem,  
 Cœlorum qui summa regit; qui disita longe,  
 Copulat, irriguas de cantibus elicit undas,  
 Cordaq; vel solo permulcet ferrea nutu.

Talia Carpilio memorat, rapidisq; feruntur  
 Passibus; innocuo qua Mincias unda natatu  
 In Phaëtontæum desert sua viscera flumen.

## FVLVII CORRADI CLERICI SEMINARI.

### Argumentum.

**A**NGELVS horrificis terroribus Athilan Orget,  
 Educens Gothicum Stygijs Alaricon ab antris.  
 Exardet stimulis irarum Pluto, furensq;  
 Compellat diram Aleto; falsa ora Alarici  
 Induat, & Regem repetens, cantata recantet  
 Colloquia, & positi reuocet conamina belli.  
 Sed Cali iam miles adest. Leo voce Gerenda  
 Hunnum arcet, sauaq; refert de gente triumphum.

# IO: BAPTISTAE LAVRI PERVSINI.

## LEONIDOS.

### *Liber Tertius.*



IMPIGER vmbroso Genius remearat  
ab Orco,  
Imperijs parens magni Bar-Ionidæ: at  
illum  
Tartareos linquentem adytus, obscu-  
raq; Ditis  
Ostia, de cuneis Animarum educus

opacis,

Insequitur pallens Alaricus; & obrutus igne  
Fulguris Angelici, trepidos in pectora pulsus  
Accipit; & magicas cum iam non horreat artes,  
Labraq; liuenti verborum imbuta veneno;  
Concutitur grauiore metu; suspensus & anceps,  
Quas eat ad partes, quos transducatur in vsus.  
Ac dum per tacitæ telluris opera feruntur  
Ad Consentinæ valles, ditataq; busto  
Bussenti vada glauca suo: tali vrget euntem  
Angelus alloquio. Quibus vreris, his quate flammis,  
Atq; age diuersos, qui rerum exempla tuarum,  
Insumpsere sibi, flexu qui mentis eodem,  
Milite prætendunt Romam temerasse profano.  
Vnum præ reliquis pugnas; qui pectore toto

*Aestuat*



*Aestuât in Latios tractus, Romanaq; vecors  
Diripit arua animo; cum Nox densissima fuscis  
Arserit Astrorum faculis. Quoq; acrius iste  
Pertenuis sensus, faciesq; cadaueris illa,  
Qua Sicularum olim sub fixibus occidis, Hunno  
Incubet, & stolidi reuocet conamina cæpi:  
Indue corporeum pondus, quod ab arce sepulchri  
Erueo; & Stygiæ referens incendia terræ,  
Subde breues in luce moras, quas hauseris æger,  
Post deuastatam ternis excursibus Urbem.*

*Hæc ait, & Bussentinum deducit ad amnem.  
Tunc aliouersus flumen iubet ire, retortis  
Fluctibus, atq; imi reteggit vada littoris: inde  
Eruit infossos artus. Ignota sepulchri  
Effigies, non Niliacas imitata Columnas,  
Aëre non vacuo pendentia Mausolæa,  
Non caua saxa Phrygum. nam cum prope mœnia Rhægi  
Fati supremas Alaricus abiisset in horas:  
Ne quis, ab hostili perculsus pectora thyrsos,  
Effoderet corpus, diuisumq; ense per agros  
Spargeret; hæredis cauit pia cura. reflexos  
In gyros curuat Bussentum, & tempore certo  
Corruat; famulum dum plurima turba latebras  
Effodiat, Thesaurorum quas molibus explent;  
Ac super imponunt defuncti corpus; humosq;  
Largius ingesta, primos vaga flumina cursus  
Instituunt, solitoq; latex adlabitur alueo:  
Tum ferro incauti sternuntur, quotquot agendo  
Artifices se exercuerant; ne fama sepulchri  
Regis, conciret cupidas ad furta cohortes.*

*Iam viuax Alaricus erat, iam corpore viuo  
Cum Duce sidereo, celeres per inane volatus*

Carpebat, rapidiq; Padi iam nota tenebat  
 Littora. Dimensam Phæbi levis orbita lucem  
 Torserat; Hesperio properabat ab æquore, pictum  
 Nox stellis umbrata caput. irux Athila somnum  
 Ebiberat; flatu venas perfusus anhelō,  
 Post graue dissidium mentis, reuolutaq; belli  
 Consilia, angusti recubabat limine tecti.

Ille Erebi de face madens, metuendus in armis,  
 Et tamen extremi ducens cruciamina lethi,  
 Incumbensq; toro. Quid, ait, ferit effera pectus  
 Sedulitas? quid Tarpeijs intendere vincla  
 Rupibus, imprudens vestigia nostra secutus,  
 Hunne paras? non est tutum contendere contra  
 Astriferas moles, Orbisq; arcana superni.  
 Crede mihi, quisquis Latijs adspirat habenis,  
 Quisquis Romuleos inuertere vomere colles,  
 Adpetit; ille ausu Icario libratur in alas,  
 Et cadit in præceps. ille ætheris excidit arce,  
 Et miserum Phæäonta refert. quin coniicis in me  
 Lumina, diluio armorum qui Martia tecta  
 Inuolui; exiguo sed temporis interuallo,  
 Bruttia Sicanium qua respicit ora Pelorum;  
 Febribus immodicis, altaq; voragine morbi  
 Deuoror; inde nigra Eumenidum detrudor ad antra.  
 Qui premar æternum flammis, supraq; nocentum  
 Supplicia, ab pænis longe grauioribus angar.

Hæc fatur; raptimq; abiens (nam Lucifer albo  
 Vectus equo, iubet emeritam discedere noctem.)  
 Elicit occultos ignes, atq; Athilan atris  
 Afflat agens facibus, rabiemq; inculcat Aucrni.

Tum Bussentinus recipit sua corpora vortex,  
 Styx volulantem animam. Somnos discussit inertes  
 Horrens

Horrens forma Viri; stratîsq; exurgit ab altis,  
Certus ab Ausonijs Martem deflectere campis.

Hæc malus inferno rimatus ab aëre Dæmon,  
Irarum exarsit stimulis, iussumq; Alaricon  
Acciri ad sese, flammis maioribus ussit;  
Ac raptum in sublime, ter in Phlegethontide mersit  
Vnda, Ixionio ter agi præcepit ab orbe,  
Sisyphium ter volvere onus: mox crimen acerbans;

Quid pius in fontes sons ipse, & iriste coërces  
Ingenium, fueras olim qui carmine tali  
Ante coërcendus, quàm septem culmina Romæ  
Dirueres, trîstiq; reum te clade ferires?  
At puto, cælesti compulsus ab Alite, nostri  
Eiuras decreta Poli; moremq; modumq;  
Tartareum oblitus, reuocas à crimine Regem.  
Quis furor, o Superi? quæ tanta audacia? vestris  
Degite concilijs; raptas adsumite in arces,  
Vnigenam quicumq; colunt. quid dedita nostris  
Ritibus, Empyreas dicto execrantia leges  
Pectora, per nostri tæterrima robora Regni,  
Flectitis ad rectum? faxy, cantata recantet  
Consilia, atq; animos soluat, quos ante ligarat,  
Fronte sub induc'ta fallax Alaricus. Auerno

Tum ciet ex imo, nescientem crinibus angues  
Luctificam Aleto, properè quam talibus implet.

Perge age, bellorum sotrix, spes fida Barathri,  
I, Gothicum simulata Ducem; belli excute flammæ,  
Et super induc'tum cinerem, succende priores  
Hungaridæ furias; & quæ tibi cumq; Colubræ  
Cæsariem incingunt, inspirent præmia pugnae,  
Intendantq; truces animos. Volat ocyor Euro:  
Ac multa de nocte, Ducem; qui in luce pararat

Bellonam transferre alio, fortesq; phalanges;  
 Aggreditur. Quæ te (indignum) sententia vertit,  
 Ecquis præclaro suavit desistere ab orsu,  
 Maxime Pannonidum Ductor? certe inuida nubes,  
 Et nequam Liuvor, tumidam ne mittere Romam,  
 Sub iuga, ne cogas tua sub vestigia Thybrim,  
 Et tanti spoliæ temet splendore triumphæ.  
 Noui, quas in te fraudes intendat Erynnis,  
 Indignansq; tuli. men' refferat ipsa? meiq;  
 Viuida ab effigie, reuocet tua vota; silenti  
 Dum somnum sub nocte bibis? mendacia mecum,  
 Indolui, tristemq; vicem miserans populorum,  
 Qui Latias duce te sperant calcare curules:  
 Sedibus Elysiis vltro digressus, adiui  
 Hasce domos; qui te admoneam, stringenda in Etruscum  
 Arma latus, Geticoq; adeundam milite Romam.  
 Ipsa Palatino residens in vertice Virgo,  
 Te vocat, atq; Aquilas bellatrix Gloria frangit.  
 Talia voce refert, tacitisq; adsibilat hydris,  
 Romuleum obijciens dubia sub imagine Regnum.  
 Protinus ille toro erigitur, veteremq; furorem,  
 Infractosq; animos, stimulo grauiore resumpsit.  
 Haud secus, vndanti fluvius qui labitur aluco,  
 Frangitur obiectu lapidum, seseq; coërcet  
 Spumeus; amoto dum tutus ab obijce, primas  
 Turgeat in furias, ex more licentius errans.  
 Ergo faces missæ rursus ferus Athila pugnae  
 Excitat, & Scythicas hortatur voce cohortes.  
 Tollite signa Duces, disrumpant classica somnos,  
 Inq; omnes redeat ferri calor. omnia pessum  
 Vestro Marte ierint, per quem cecidere tot Vrbes  
 Europæ, patriq; caput pacauimus Istri.

Cesserit



Cesserit innumeras una hæc Victoria palmas;  
 Romanas rupisse fores, fregisse Quirini  
 Mœnia. Vos serie Gothicarum accendere rerum,  
 Est pudor: & paucis insomnia vera referrem;  
 Ni foret, Ausonias qui irrumpere suadet in oras;  
 Me minor, hoc alias alij, fecere: quid Hunnus  
 Non super his ausit? communis laurea mentes  
 Occupet: auulsis Latij compagibus; rura  
 Quid queat Hungaricæ se dirum opponere dextræ?

Dixerat: assensu cunctæ fremuere phalanges.  
 Quantaq; per siluas discurrent murmura; ramis  
 Cum Notus incubuit: tantus ferit æthera clamor.  
 Diuellit iam castra loco, dispositaq; ripis  
 Armamenta rapit, non segnis in agmine miles.  
 Pontibus arctatur Padus ingens, litus virumq;  
 Iungitur, & Geticis substernitur vnda manipulis.

Porro & ab Æmpyreis exercitus instrepat oris,  
 Signiferum te, Paule, sequens; tua iussa capessens,  
 Petre Simon: classes aris seges alta per omnes  
 Diuiditur. pars hæc arcus, pars illa trabalem  
 Crispat agens hastam: micat acribus illa sagittis,  
 Hæc facibus; genera armorum vix longè tuendo  
 Expedias: legio incedit pennata per auras  
 Discolor; & certo spatiat nubila ductu.  
 Tu quoq; in exitium scelerati Principis, vltro  
 Eutropia cum Fratre; venis: Tu Regibus orta,  
 Vrsula; Virgineis graderis vallata cateruis;  
 Martyrij Sanctis quamquam lætissima signis.

Iam vero Eridani in fluctus vibratur ab alto  
 Fulgor, & Angelicæ referitur forma cohortis,  
 Et sonus armorum, flammataq; lucis imago.  
 Res ea, Pannonicum dum flumina traiecit agmen,

Non tenuem incussit gelidæ formidinis ictum.  
 Pars retro turbata abiit; pars hæsit in iisdem  
 Passibus, immodicis constricta pauoribus; illic  
 Pars semet gladijs exterrita confodit; hic pars  
 Desilit in vastos sinuosi gurgitis orbes.  
 Despicit hos, si quis mentis sustollat acumen,  
 Rerumq; eliciens causas, putet omnia secum,  
 A geminis Cæli regionibus emanare.  
 Vel quæ ab deflexu radiorum disjuncta, crudum  
 Frigus alit, proprijsq; opibus succensa, rigentes  
 Vertitur in facies. Vel quæ vicinior Axi,  
 Aestuat, & rutilis exercet prælia flammis,  
 Nec minus in cursu trux hæserat Athila, pigram  
 Corde premens glaciem, Paulo vibrante sagittas,  
 Frigus agente Petro. Sed iam Leo desuper undas  
 Eridani occurrit Geticis Legionibus. olli  
 Stipat utrumq; latus, stricto spectabilis ense,  
 Paulus; nudato gladio Bar-Tonius heros.  
 Certus militiam Cæli discriminat ordo;  
 Et duplici cuneo, florentis honore coronæ  
 Romulidem cingit: stat mobilis ora Tyranni  
 Nil oculo renuente, tuens; spectantibus æthræ  
 Ciuibus, & linguæ illustrem formantibus orsum.

Interea Patres Hunno dum dira minantur;  
 Auscultet ni forte Seni; sacroq; coactus  
 Pareat alloquio, atq; aliò certamina vertat:  
 Romanus placido sic inchoat ore Sacerdos.

Inclyte Pannonidum, cuius fax bellica toto  
 Terrarum memorata solo, quatit horrida gentes,  
 Et quas digrediens ab Eoo cardine Titan,  
 Et quas, Hesperijs cum languidus incidit undis,  
 Respicit; obliquo Boreas quas sidere; quasq;

Auster:

*Auster: quam non immerito de finibus usque  
 Prouecti Ausonijs, veneratum venimus, æqua  
 Has voces, precor, aure hauri: sic proxima votis  
 Stent Cæli Astra tuis; sic grandibus aucta trophæis,  
 Hunnica de digno celebrentur nomina cultu.*

*Naturæ Genitor, Mundi nascentis in annis,  
 Regnorum cum iura daret; mansura per omnes  
 Fœdera discreuit tractus, subsideret imis  
 Orbis carceribus vastissima terra; secundo  
 Feruerent gremio spumantis regna profundi;  
 Aëreos legerent tum pondera tenuia campos;  
 Hæreret Cælo vigor igneus. hanc quaternam  
 Materiem lex vna ligat; neu deuia, discors,  
 Nexibus abruptis, adscripta ergastula rumpens,  
 Concordi cinctam vincolo, pulchro ordine textam  
 Congeriem, prisca tenebris inuoluat Abyssi.*

*Atq; adeo exemplo partitæ molis; & Orbem  
 Latè regnandum Regi non contulit vni.  
 Hic Pontum Lyciamq; regit, plaga subditur illi  
 Cappadocum, dorsoq; Cilix male tutus iniquo.*

*Argentes alij Colchos, arcuq; potentes  
 Armenios; alij Syriam, Solymosq; coërcent.  
 Sunt & queis Babylon, sunt & queis Parthia seruit,  
 Bactraq; , & extremum quæ respicit India Gangem.  
 Huic & Marmaricas circumplicat Africa Lauros,  
 Huic sinus Aethiopum. Regio possessa Britannis,  
 Vinzelicisq; tumens immanis Rhætia opimis,  
 Dat famulas illi palmas, Tibi Pannonis ora,  
 Illyricumq; latus; tibi bellax Sarmata, Dacus,  
 Et quotquot gelidus, glacialibus educat oris  
 Arctophylax, scyticoq; rigens obit æquore Nereus.*

*Quisq; suo contentus eat. tamen vnde per orbem  
 Regnandi*

Regnandi male sanus amor? non finibus ille,  
 Arctatur patrijs, multas dominatur in Vrbes;  
 Non auidum sors tanta capit: suspirat in omnes  
 Alterius ditionis opes: velut indigus agri,  
 Exsuliumq; diu passus, regna extera quarit,  
 Inq; peregrina solium sibi destinat aula.

Sic, quem cælestes poterant docuisse recursus,  
 Et Mundi melioris opus, confudit iniquus  
 Ordo sui, impatiens vnus fornice Cæli  
 Obtegi; & innumeros cupidus cognoscere Mundos,  
 Astrorumq; acies: tenuit malus error & altos  
 Pellæi Iuuenis manes, qui vicerat Orbem,  
 Non animæ dux ipse suæ; Macedumq; cohortem  
 Primus ad Herculeas protendens vsq; Columnas,  
 Ingens, exigua vix nunc includitur urna.  
 Tantulus ergo iacet, solium cui prorogat aureum  
 Lex Fati breuior. porro hæc trabs aurea, edacem  
 Interius cobibens cariem: mare dixeris, anceps  
 Quod pepigit fædus volucris cum flamine Cori.  
 Scilicet externis sedem qui figere in aruis,  
 Inq; alios seuisse velit; communia rerum  
 Is iura, & mundum velit euertisse nitentem:  
 Et cum frænarit populos, grassatus in omnes  
 Sponte plagas, crinemq; ferox diademate multo  
 Presserit; incurret Mortem: quæ liuida, inermis  
 Excubat in vitæ speculis, & falce recurua,  
 Maturos, immaturos, rerum omnium egenos,  
 Florentesq; Ducum titulos, regesq; potentes  
 Importuna metit. quid nunc linquenda petantur  
 Præmia? quid vanos toleret mens ægra tumultus?  
 Quid qui vesanum pressus caligine pectus,  
 In fora Calicolum stringit sua tela, sacrasq;

Perfurit



Perfurit in caulas, & castos dissipat Agnos?  
 Longè, oro, mens ista homini: tutissima, concors  
 Perstet in Orbe Fides. Olim Babylonia torquens  
 Sceptra Nabuchdonosor, Solymi donaria templi  
 Diripiens, sacras lances, & abænea labra,  
 Cymbiaq; , & mensas, auriq; e mole lebethas  
 Aufert; septenis qui messibus inter Onagros,  
 Infelix lolium, & pallentes ruminat herbas.  
 Posteritas commissa luit: Balthassar iniquum  
 Sortitur solium; Satrapis regale, superbum  
 Indicens epulum, princeps accumbit; at escas  
 Lancibus imponit sacris, Calicesq; potenti  
 Baccho onerat, vetitoq; miser se proluit auro.  
 Ecce autem, dum iussa cohors discumbere, luxu  
 Indulget nimio, Regemq; in pocla frequentem  
 Prædicat (o superæ miracula incognita dextræ!)  
 Protinus adspectat Rex, toto immobilis ore,  
 Pariete suspensos digitos, raptimq; volantes,  
 Ducentes vltro hæcce notas. Numeravit Olympi  
 Rex Regnum, dux magne, tuum; & quod deerat, abunde  
 Suppleuit. nunc in trutina libraris, & experts  
 Plus minima iam parte tui es. iam principe bino  
 Diuideris, Regnumq; alio transfertur; & æquè  
 Partem Persa minax, adsumit Media partem.

Nec mora, funereos cum Nox accincta cupressus,  
 Proferret lacrymosa caput; Chaldaus acuto  
 Ense cadit, pœnasq; operis, te vltore, profani  
 Rector summe, luit. tales qui exosus ab æui  
 Principijs culpas; quia nunc Alaricus easdem  
 Tantum ex parte nouat, totam tamen æquus in illum  
 Promis vindictam. Sanctam cum perdere Romam  
 Excidio, & nostro perfundere sanguine Thybrim  
 Discu-

Discuperet: prudens rabidis legionibus acrí  
 Nunciat edicto; ne quis temerarius Vrbe,  
 Impeteret ferro, sacras quicumq; sub ades  
 Confugerent, seq; obiecta pietate fouerent.  
 Præcipue Petrum reuerens Paulumq; , tepentes  
 Cæde manus prona capitis summitteret arce.  
 Cumq; furens trepidam miles succenderet Urbem,  
 Et Bar-Ioniaca Calices rapuisset ab Aede:  
 Continuo cautus sacrata in templa referri  
 Iussit, & iratum placari ihure Tetrarcham.  
 Sic pius, atq; humili contentus Marte; Pachinum  
 Dum petit, & placido componit carbasa ponto:  
 Vi lethi subita abreptus, Latialia tantum  
 Mœnia calcasse; ab quantum terrore profundo  
 Indoluit; tardeq; animos inflexus, amavit  
 Haud Romæ tetigisse latus: nunc conditus Orco  
 Aestuât; & nigra sorbens incendia vallis,  
 Aeternum perisse velit; tandemq; receptis  
 Ignibus, in ventos consumptus abisse: sed altæ  
 Lex prohibet perisse necis. Verum adspice temes  
 Athila, circuitu tanti contentus abunde  
 Imperij: dubias noli transcribere palmas,  
 Qua vindex Deus, instructus cælestibus armis  
 Ausonios seruat lymphato a milite tractus;  
 Et Capitolinis iaculans de sedibus ignes,  
 Hostili ab clypeo Romanum vindicat Orbem.  
 Ecquisquam vecors Superos in prælia poscat?  
 Aequetur superis humana potentia regnis?  
 Nec vero nostra non de ditione triumphas,  
 Et sperata refers trepida de plebe Quirini  
 Præmia. iam duplex cumulat Victoria fœnus,  
 Et maior tua Fama volat. prosternitur vltro

Plantas

Plantas ante tuas Populus, qui Victor utrumq;  
 Ambijt Oceanum, cuius nomenq; decusq;  
 Aemulus humentum stupuit frenator aquarum.  
 Tu tamen extremi domitorem cardinis, alto  
 Subijcis imperio: quod si quoq; fræna remittas  
 Irarum, & venia populum dignere precantem;  
 Ipse tui victor, donabere duplici sceptro,  
 Nec iam nos fuerit, quam te vicisse decorum.  
 Te certe humanæ dudum fastigia palmæ  
 Transcendisse vides, nil iam superesse, quod optes;  
 Excessisse fidem gestarum immania verum  
 Nomina. quid sacros ni demum accedere ad axes;  
 Est super, & fieri propius stellantis Olympi  
 Ciuibus? ut quos obrueris victricibus armis,  
 Incolumes vsq; esse velis, nec perdere eosdem;  
 Qui tua submisso verrant vestigia vultu.

Talibus orabat Senior, securus amati  
 Fœderis. heroes strictis mucronibus vrgent;  
 Promptaq; sidereus circumsonat arma satellites.

O nimium verbi vis indeprenta superni,  
 Aetherias complexa plagas, quæ turbine sacro  
 Immensum per inane ruis; perq; ora verendi  
 Præsidis erumpens, ceu lapsum ex æthere fulmen;  
 Frangis caucaseas mentes; & abænea corda  
 Mulces igne tuo; quæ attactu mollia, miras  
 In species abeunt. Iam non ferus Athila, iam non  
 Corde ferox; abiit feritas, abiere minarum  
 Nubila. Pax totis exæstuat alma medullis,  
 Nomen Pacis amat, toruo Pax aurea in ore est.  
 Iam victas dat sponte manus, sanctoq; Parenti  
 Supplicat; Italicis reddat se protinus aruis,  
 Et meritos Getica referat de gente triumphos.

Se nihil ausurum posthac ; quod regna Quirini ,  
 Quod quatiat Latiale forum : verum ille clientem ,  
 Mancipiumq; putet ; præscribat iura , catenas  
 Inijciat , Scythicas iubeat penetrare paludes ;  
 Paruerit : Latijs reddat se protinus aruis ,  
 Ingeminat ; lætusq; , loco si cedat , & ipse  
 Cesserit : obstare arcanum quid , quo minus inde  
 Se abstraxisse queat . super & satis esse minarum ;  
 Nil fore , cur stricto ferri mucrone petatur .

Adsisit stupefacta cohors ; quæ sparsa per auras  
 Agmina , & expositos bellorum ad signa maniplos ,  
 Non capit obtutu : pauidos tamen hauserat ictus ,  
 Admirata Ducem ; in Romam modo fulmina , cædes  
 Spirantem , & tumido laxantem fræna furori :  
 Nunc mitem , accliuemq; solo , pia dicta mouentem ,  
 Lambentem tremuli vestigia fessa Leonis .  
 Nec mirum . instabat iaculis exercitus omnis ,  
 Et nudata Duces vibrabant arma ; proteruus  
 Si contra obstasset , Patri & parere negasset .  
 Sed plene infracto Lepori quis spicula demens  
 Inferat ? implicitis quis tendat retia Thymnis ?  
 Post prædam Venator abit ; lætusq; volensq;  
 Posthabet , & vacuus patrias ultro petit oras .  
 Quid facias , Romane Parens ? secedis , & alte  
 Attollens visus , grates agis illico toti  
 Militiæ ; in primis geminum dum voce Tetrarcham  
 Compellas : se se ex oculis ignobilis Hunni  
 Auertant paullum ; pergisq; adscribere palmas  
 Vtriq; Hungaricas . Rex circumquaq; rotato  
 Lumine , longè alio auectas videt esse cohortes .  
 Inclamatq; dolens . Felix Romane Sacerdos ,  
 Felix Italiæ tractus : tibi militat Axis ,



*Et decimæ Regionis honor, te propter acutis  
 Horridus in clypeis Heros latè vnus & alter  
 Pugnat; te æternis, in me iurata, trophæis  
 Stellantes supra esse globos iubet enthea virtus.  
 Flectite iter socij; ripas contendite ad Iſtri,  
 Pannonicumq; orbem: longe attentasse recessus  
 Romuleos, huc vsq; sat eſt: sat voce coronas  
 Vſurpaſſe tuas. Cælo gratiſſime Thybri,  
 Scilicet in patrijs ſenium componere terris,  
 Decretum fixumq; mihi; procul æmula Martis  
 Dexterâ; Palladijs replet mihi paruus in vlnis  
 Athila, pacifera frontem redimitus oliua.*

*Sic ait: & quanto Nilus fluit agmine, ſeptem  
 Cum ruit ad portas, & ditat rura Canopi:  
 Tanto ſublatis inſignibus, impiger Hunnus  
 Proruit; & rauco reſonent cum cornua cantu,  
 Nil furiale ſonant, nil quo, de more, retinet  
 Accenſas Bellona acies. Hymenæa canoro  
 Aere cient, dubio celebrandas omine tædas,  
 Ore iterant. rapido præuertunt agmina paſſu,  
 Connubiale gerens vinclum Saturnia Iuno;  
 Triftis Hymen ſine luce faces; ſuccedit Iacchus,  
 Ebria ſuſtentans tremulo veſtigia thyſo.*

*Rem probat euentus, talamos, Strigis omine læuo,  
 Dum celebrat, grauidoq; onerat conuiuia Baccho;  
 Noctè autem, madidas exſudans marcidus eſcas,  
 Profluuium paſſus calefacti ſanguinis, vnca  
 Nare vomens animam, ſpecubus damnatur Auerni.*


*Sed iam cæleſtis, dimittitur aère toto  
 Militia, & ſuperæ legionibus additur aulæ.  
 Aëreum pellucet iter; veſtita ſereno  
 Nubila, purpureus non indignatur Olympus.*

*Protinus*

*Protinus Ausoniam repetit Leo: plaudit ouanti  
 Romulidæ, quæ quæ graditur, gens omnis; & alie  
 Attollunt humeris, seruatoremq; Latini  
 Nominis; Hungarici referentem signa Triumphi  
 Vocibus alternant; structoq; vtrinq; theatro,  
 Sublimem celfo Capitoli in vertice sistunt.*

**F I N I S.**

*Laus Deo & B. Mariæ.*



**AD**

# AD ATHILAM HYNNORVM REGEM.



**A**VSONIAS, i, rumpe fores, inuertere aratro  
 Mania Romulidum, Rex iraculente, para.  
 At tibi magnanimi sis infringenda Leonis,  
 Pectore non trepido qui tua castra petit.  
 Nec vero Herculeæ tibi Virtus inclytæ dextra:  
 Cede, aut ab forti victæ Leone, iace.

Nicolaus Sensus Sem. Cler.

## DE D. LEONE PONT. ET ATHILA.

**E**ST Labor Alcida, qui iuxta brachia Cancri,  
 Qui iuxta Erigonen, fulget in axe LEO.  
 Terret adhuc, si qua in silua stellantis Olympi  
 Sidere conspicuo Bellua picta fremit.  
 Est Christi labor, Ecclesia quod Olympicus axis  
 Splendeat, & gremio sidera sacra gerat.  
 In grege bissono Astorum, diuina LEONIS  
 Signa, lacertosus sunt metuenda iubis.  
 Terret latrantes eius regionis alumnos,  
 Extra si qua latret Bellua, sternit humi.  
 Ah victus pone, Hungarica Canis accola terra;  
 Aut tua perfodiat viscera dente LEO.

Idem.

DE





DE ILLVSTRISS.

# POMPEIO ARRIGONIO

## CARD. ET ATHILA.

**A**THILA Pannonicis praeceps delatus ab oris  
 In iura Italidum, Romuleosq; lares:  
 Vincitur inuisa metuendi Vocce LEONIS,  
 Et fugit ad patrios non rediturus agros.  
 Idem POMPEII pedibus nunc subditur vltro,  
 Seq; iugi patiens mancipat ecce Patri.  
 Heroi ducit satius parere Latino,  
 POMPEIO & regnum credit inesse triplex.

Tetius de Alexandris Sem. Cler.

# DE D. LEONE PONT.

## ET ATHILA.

**M**VLGET barbaricum leni sermone Tyrannum,  
 Atq; alio cogit castra mouere, LEO.  
 Vrget & Heroum par nobile; spicula in Hunnum  
 Dum parat, atq; habili milite discutiatur.  
 Astutum Hungaricas rapitur fugitiuus ad Vrbes:  
 Ne fuge, ne dubias Athila carpe vias.  
 Ne fuge; post paullo si sis morituro Lyao,  
 Heroum ad sanctos praestat obire pedes.

Tullius Nerutius Sem. Cler.

# FINIS.



MAN  
TIANI



